

TE UTU

TE KATANOATA NAKON TE AONAABA

TE MOAN BERETITENTII AO TE KAUNTIRA N ABOTORO AKE TENGAUN MA UOMAN N ANA EKARETIA IESU KRISTO IBUKIA AOMATA AIKA ITIAKI NI BOONG AIKA KAITIRA

NGAIRA, TE MOAN BERETITENTII ao te Kauntira n Abotoro ake Tengaun ma Uoman n Ana Ekaretia Iesu Kristo ibukia Aomata aika Itiaki ni Boong aika Kaitira, ti katanota ma te kaantaning a tabu bwa te mareaki imarenan te mwaane ao te aine e katabuaki iroun te Atua ao te utu bon te bwai ae kakawaki nakon ana babaire te Tia Karikibwai ibukin aroia Natina.

NI KABANE AOMATA—mwaane ao aine—a karikaki ni katotongan te Atua. Ngaiia n tatabemaniianako bon naati mwaane ao aine aika tamnei aika a tangiraki irouia aia karo ake i karawa, ao, n aron anne, ngaiia n tatabemania iai aroia ae moan te kakawaki ao te kakannato n aron bairean aroia n te aro n atua. Te Mwaane te Aine bon ngaia oin anuan temanna n te maiu n tamnei, n rabwata, ao kinakim ao te kaantining ae akea tokina.

NTE MAIU ARE IMWAIN TE MAIU N TE AONAABA, naati mwaane ao aine aika tamnei a ataia ao a taromauria te Atua bwa Tamaia ae Akea Tokina ao a butimwaai Ana babaire n te aro are Natina a kona ni karekei rabwata ao te iriko ma te rara ao ni karekea aia atatai n aonaaba n rikirake nakon te kororaoi ao n tokina ana ata aroia n te anua n Atua bwa ngaiia taani bwaina te maiu ae akea tokina. Ana babaire te Atua ibukin te kukurei e karekea te konaa irouia utu ni kateimatoa aia itoman imwiin naba te mate. Otenanti aika a tabu, ao berita aika tabu, ake a kona n reke n tempora aika tabu a karekea te anga ibukira n tatabemania ni kona n oki nako rarikin te Atua, ao ibukia utu bwa a na katiteuanaaki n te tai ae akea tokina.

TE MOAN TUA are e anga te Atua nakon Atam ao Ewa bon ibukin are a na kona n riki ni karo ae mwaanenumwa ao ainenumwa. Ti katanota bwa ana tua te Atua ibukiia Natina are a na rikirake ni mwaiti ao ni kaonrakea te aonaaba e teimatoa naba ni bwainaki ngkai. Ti katanota riki bwa e a tia te Atua n tua bwa te mwaaka ae tabu ibukin te aro ni kariki ana ti kabongaki imarenan te mwaane ao te aine, ake a tia ni mareaki iaan te tua bwa te mwaanenumwa ao te ainenumwa.

TI KATANOATA aron te maiu ae mamate are e karikaki iai bwa e karaoaki n te mimitong ae tabu. Ti kamatoa tabun te maiu ao kakawina inanon Ana babaire te Atua ae akea tokina.

TE MWAANENUMWA AO TE AINENUMWA iai tabeia ae mimitong ao n tabu n tangiria ao n tabeakinia ibon irouia ao ibukiia natia. “Ataei bon ana bwai n tituaraoi te Uea” (Taian Areru 127:3). Iai tabeia kaaro ae tabu ni kaikawaia natia n te tangira ao te kororaoi, ni karekei bwaai ibukin kainnanoia n te aro n rabwata ao n tammei, n reireinia n tangira ao ni beku (ibukin temanna) ibon ibukiia, ni kawakin ana tua te Atua, ao n riki bwa aomata aika a kawakina te tua n taabo ake a maeka iai. Mwaanenumwa ao ainenumwa—tiina ao kaaro—a na boni bukintaeka imatan te Atua ibukin karaoan mwiokoia aikai.

TE UTU e riki n tabu iroun te Atua. Te mare imarenan te mwaane ao te aine e kakawaki ibukin Ana babaire ae akea tokina. A bon riai ni bungiaki ataei nakoia kaaro ao tiina ake a tia ni mareaki raoi, ao ni kaikawaki iroun te karo ao te tiina ake a kawakin aia berita ni mare ma te kakaonimaki ae kororaoi. Te kukurei n te maiu n utu e na kona n reke ngkana e aanaki n ana reirei te Uea ae Iesu Kristo. Maare ao utu aika nakoraoi a kateaki ao ni kateimatoaki iaon botoniango n te onimaki, te tataro, te rairannano, kabwarabure, karinerine, te tangira, te nanoanga, te beku, ao kakibotu aika itiaki. N aron ana babaire te Atua, kaaro boni ngaiia ake a na kairiri n te utu n te tangira ao te kororaoi ao bon tabeia ni karekei baika a riai ibukin te maiu ao ni kawakinia aia utu. Ointabeia tiina bon te tararuia natina. Inanon mwiokoakia aika tabu aikai, a katabeaki kaaro ao tiina bwa a na uaia ni ibuobuoki imarenaia bwa rao aika ti te arona ngaia. Te toara, te mate, ke bwaai riki tabeua e kona temanna ni bita arona ni kangaraoia. Kaain te utu ake raoia a kona naba n anga aia ibuobuoki ngkana e kainnanoia.

TI KAURING bwa naake a urui berita aika tabu ibukin te itiaki, naake a kuaia buia ke natia, ke naake aki kakoroi mwiokoia ibukin aia utu a na bon bukintaeka ao a na tei n te tai teuana i matan te Atua. Ti kauringa riki, bwa uruakin ke maenakon te utu e na karekea nakon temanna, bootaki ao tautaeka taiani kanganga ake a kaman taekinaki ngkai irouia burabeti.

TI KANAKOA BWANARA NAKOIA aomata ake a onimakinaki ao abitia n te tautaeka n taabo nako bwa a na karikirakei itera aikai ake a karaoaki bwa ana kateimatoai ao ni kamatoa te utu bwa ngaia aan te botanaomata.

Te katanota aei e bon warekaki iroun Beretitenti Gordon B. Hinckley bwa mwakoron ana rongorongo n te Bootaki n Aine ni Kabuta ae karaoaki n Tebetembwa 23, 1995, i Salt Lake City, Utah.

ANA EKARETIA
IESU KRISTO
IBUKIIA AIKA ITIAKI
NI BOONG AIKA KAITIRA